
XALQARO “ARMIYA-2020” HARBIY O’YINLARI FARG’ONADA

Shu kunlarda xalqaro “Armiya-2020” harbiy o’yinlari qatnashchilari Farg’ona zaminida ko’tarinki kayfiyatda kutib olingan.

Xalqaro “Armiya 2020” harbiy o’yinlari joriy yil 25 avgust sanasidan 3 sentyabrga qadar bo’lib o’tadi. Shu kunlarda qura tashlash marosimi o’tkazilib, jamoalar bellashuv grafiklari e’lon qilinishi rejalashtirilgan.

E’tirof etish kerak, musobaqalar doirasidagi barcha harakatlar karantin va sanitariya-gigiyena talablaridan kelib chiqqan holda tashkil etilmoqda.



18 avgust kuni Sharqiy harbiy okrug shtabi tomonidan Rossiya va Belorusiya terma jamoalari a'zolarini tantanali kutib olish marosimi tashkillanib, mehmonlarga o'zbekona lutf bilan non va shirinliklar ulashildi. So'ngra ular musobaqalar bo'lib o'tadigan manzilga kuzatildi.

Rossiya va Belorusiya terma jamoalari vakillari o'rtasidagi musobaqalar Sharqiy harbiy okrugining Qo'qon shahridagi harbiy qismlaridan birida bo'lib o'tadi.

Mehmonlar viloyatimizning diqqatga sazovor, turistik ob'yektlariga tashrif buyurdilar. Shundan so'ng, Qo'qon shahrida joylashgan harbiy qismda buniyod etilgan Xotira maydonida Vatan uchun jonini fido qilgan yurtimizning mard va jasur o'g'lonlari xotirasiga hurmat bajo keltirildi.

Xalqaro miqyosdagi mazkur musobaqalarni yuqori saviyada o'tkazish uchun viloyat hokimligi hamda Sharqiy harbiy okrug qo'mondonligi tomonidan katta hajmdagi tashkiliy va tayyorgarlik ishlari amalga oshirildi.



Harbiy qismda Farg'ona vodiysidagi tarixiy maskanlarni o'zida ifodalovchi kompozitsiya tashkil qilindi. Ushbu mo''jaz majmua mehmonlarda, qolaversa, barcha yig'ilganlarda katta taassurot qoldirdi.

Xalqaro "Armiya-2020" harbiy o'yinlari respublika va viloyatdagi ommaviy axborot vositalari, ijtimoiy tarmoqlarda muntazam yoritib boriladi.

SHARQIY HARBİY OKRUG MATBUOT XİZMATI.

2020-08-19 16:22:09